



Inatsisartuni ilaasortaq Andreas Uldum, Demokraatit
-/MAANI

Nioqqutissanik pilersuineq pillugu kiffartuunneqarnissamik isumaqatigiissutip malinneqartarnera pillugu § 37 naapertorlugu apeqquummut nr. 2012-179-imut akissut

Asasara Andreas Uldum

Nioqqutissanik pilersuineq pillugu kiffartuunneqarnissamik isumaqatigiissutip, Namminersorlutik Oqartussat KNI A/S-imut isumaqatigiissutigisaata malinneqartarnera pillugu apeqquutinnut qujanarsuaq. Apeqquutit tulleriaarlugit akineqassapput.

1. Kiffartuussinissamut isumaqatigiissummik unioqqutitsisoqartillugu KNI A/S-imut (matumani Pilersuisoq pineqarpoq) kinguneqartitsissutaasinnaasunik peqarpa, aammalu suuppat?

Kiffartuunneqarnissamik isumaqatigiissummik sumiginnaanermi pineqaatissiisutaasinnaasut 2012-imiit 2016-imut nioqqutissanik pilersuineq pillugu kiffartuunneqarnissamik isumaqatigiissummi § 7, imm. 1-imi allassimapput:

”KNI A/S isumaqatigiissummik matumanga sumiginnaappat, Kalaallit Nunaanni Namminersorlutik Oqartussat pisinnaatitaapput, akiliisitsiffiusussamik sumiginnaasoqarnerani tamatigut annerpaamik 100.000,00 koruuninik akiliisitsinissamik piumasaqassallutik. KNI A/S aatsaat isumaqatigiissutip matuma annersaanik piarinani piaaraluniluunniit annertuumik sumiginnaasimaguni Namminersorlutik Oqartussanut akiliinissamut pisussaatinneqassaaq.”

Aammattaq § 7.03-mi allassimavoq:

”Akiliisitsissutip annertussusissaanut unioqqutitsinerup suussusia, piarinaatsoornerup takutinneqartup annertussusia, aammalu unioqqutitsinerup atuisunut pingaarutaa apeqquutaassapput.”

Tassalu Namminersorlutik Oqartussat KNI A/S-imik akiliisitsissallutik periarfissaqarput, tassanili taamaallaat mianersuaalliornikkut imaluunniit piaaraluni sumiginnaanermi unioqqutitsineq annertoq pineqarpoq. Taamatut oqaasertaliinermi ilaanneeriarluni ajutoornikkut piffissami sivikinnerusumi nioqqutissanik assigiinngitsunik nunguttoorsinnaanerup paasinnineq takutinneqarpoq. Aammattaarli KNI A/S-ip pilertornerpaamik ajornartorsiutinik taamaattunik aaqqiisarnissaata, nioqqutissanillu assigiinnik nungutsisaqattaartuanninnissaata naatsorsuutigineqarnissaa siunnerfigineqarpoq.

17-08-2012
Sags nr. 2012-070740
Dok. nr. 993270

Postboks 909
3900 Nuuk
Tlf. (+299) 34 50 00
Fax (+299) 34 54 10
E-mail: iaan@nanoq.gl
www.nanoq.gl

Tamatumunnga atatillugu oqaatigineqassaaq, Naalackersuisut pineqaatissiissutigisinnaasaannut isumaqatigiissutit ataasiakkaat oqaasertaat tunngavigineqarmata, pineqaatissiissutaasinnaasut aamma isumaqatigiissummiit isumaqatigiissummut allanngorarmata.

Tassalu ikummatissanik pilersuineq pillugu kiffartuunneqarnissamik isumaqatigiissut allatut oqaasertaqarpoq, tassanilu tamatumunnga taarsiullugu isumaqatigiissut piffissami sivilunerusumi sumiginarneqarpat, kiffartuunneqarnissamik isumaqatigiissutip atorunnaarsinneqarsinnaanera periarfissiissutigineqarpoq.

2. Qanoq akulikitsigisumik KNI A/S-ip (matumani Pilersuisoq pineqarpoq) kiffartuussinissamut isumaqatigiissut atuuttoq unioqutittarpa?

Pineqaatissiissutaasinnaasut taamaallaat suliffeqarfiup arlaleriarluni piaaraluni kiffartuunneqarnissamik isumaqatigiissummi aalajangersakkanik saneqqutseriaraluernerani atorneqarsinnaapput. Misilittakkavut malillugit suliffeqarfiit kiffartuunneqarnissamik isumaqatigiissuteqarfigisatta arlaannaalluunniit taamatut pissusilersorsimanngilaq.

Kiffartuunneqarnissamik isumaqatigiissut maannakkut atuuttoq 2012-imi maajimi isumaqatigiissutigineqarpoq. Tamatuma kingorna piffissap ingerlanerani isumaqatigiissummik sumiginnaanernik malussartoqarsimanngilaq.

Sulianut, Qeqertarsuarmi cigaretinik amigaateqalernerumut taasannut assingusunut atatillugu illuatungeriit oqaloqatigiittussaapput, tamannalu amerlanertigut suleriaasiusarpoq eqaannerujussuusooq sukkanerujussuusorlu.

Siornatigut misilittagaasimasut takutippaat, pilersuinermi ajornartorsiutaasut ajutoormik, kukkusoqarneranik silarlunneranilluunniit tunngaveqartartut.

Kisiannili Naalackersuisut tungaanniit qulakkeerniarneqarpoq, kiffartuunneqarnissamik isumaqatigiissutini nutaani isumaqatigiissutini aalajangersakkanik annertuumik unioqutitsisoqartillugu pineqaatissiisinnanermut sakkussaartoqartassasoq. Oqaatigineqareersutulli pineqaatissiissutaasinnaasut taakku taamaallaat KNI A/S piaaraluni pissusaaffimminik isumaqatigiissutaasunik unioqutitsippat atorneqarsinnaapput.

3. Kiffartuussinissamut isumaqatigiissummik ullumikkorniit annertunerusumik malinninnsaq qulakkeerniarlugu Naalackersuisut sunik suliniuteqarpat?

Kiffartuunneqarnissamik isumaqatigiissut qaammatit pingasut inorlugit pisoqaassuseqarmat, Naalackersuisut isumaat malillugu isumaqatigiissut naapertorlugu nakkutilliisernerup allanngortinneqarnissaanut siusippallaarpoq.

Ataatsimut isigalugu pissutsinik Naalackersuisoqarfimmut soqutiginaatilinnik pisoqartillugu Naalackersuisoqarfik KNI A/S-imut attaveqartussaavoq, imaluunniit paarlattuanik pisoqartussaalluni. Aamma kiffartuunneqarnissamik isumaqatigiissummut

nutaamut qaammatit pingasukkaarlugit ataatsimiittarnissaq ilanngunneqarpoq, taakkunanilu KNI A/S-ip Naalakkersuisoqarfik ilaatigut kiffartuunneqarnissamik isumaqatigiissutip qanoq ingerlanneqarnera, kiisalu piffissami qaangiuttumi ajornartorsiortoqarsimanersoq pillugu ilisimatittartussaavaa.

Oqaloqatigiinnermi tassani siunissami ajornartorsiutaasinnaasut pilersuinerup isumannaassusianut eqquitinnagit iluarsineqartarnissaat aaqqinneqartarnissaallu sinunerfigalugu suliassat aaqqissuunneqarnissaat anguniarneqarpoq.

Aamma siunissami kiffartuunneqarnissamik isumaqatigiissutaasartussani pineqaatissiissutaasinnaasunik ilanngussisarnissaq Naalakkersuisunit eqqarsaatigineqassaaq, innuttaasut sullinneqarnissamisut sullinneqanngippata pineqaatissiisinaanissaq iluaqutaasutut naliliiffigineqarmat. Oqaasertaliussalli aalajangersimasut isumaqatigiissutaasup imaanut naleqqussarneqartassapput.

Naalakkersuisut kiffartuunneqarnissamik isumaqatigiissutit malinneqarnissaannik naatsorsuuteqarnerisulli, suliffeqarfiit pisuni sila assigisaaluunniit pissutigalugu ilimageriinngisaminni pineqaatissinneqartarnissaat pinngitsoorniarlugu oqimaaqatigiissitsisoqarnissaa pingaaruteqarpoq.

Neriuppunga matuma siuliani akissutinni apeqqutitit akisimassallugit.

Inussiarnersumik inuulluaqqusillunga

Jens B. Frederiksen